

aver comunicà li avisi di le cosse dil Turco al Re et quelli deputati al governo.

In questa matina fu terminà per 4 Consieri, che sier Vettor Soranzo electo per Colegio provedador a Loreo, atento ha danari per spese, possi esser electo in ogni loco. Li consieri sottoscrisseno fono: sier Piero Capelo, sier Stefano Contarini, sier Antonio Morexini et sier Francesco Bragadin. Et fu termination contra la leze.

Da poi disnar, fo Pregadi per expedir le cosse dil Studio di Padoa, che li rectori sono in questa terra, et stanno aspetar la resolution dil Senato.

Fo lete le lettere di Franza, di Roma, di Napoli, et Hongaria.

Fu posto una taja a Padoa per li Consieri, come apar per una lettera di 16 Zener passà, come i ladri erano intrati di note in casa di domino Marco Capello per robar galine, et Domenego suo gastaldo fu ferido di 8 feride, et morite: per tanto habbi libertà proclamar e dar taja e bandir *ut in parte*. *Item*, come apar per lettere di 27 Setembrio, che 4 incogniti in villa di Teolo, trovano uno Simon Pecosso su la strada, i quali ge feno mostrari la man e la tajona, facendoli dar gran merce: per tanto danno libertà al dito podestà di dar taia chi acuserà lire 500, et sapendo li delinquenti possi bandizarli di terra e luogi, con taia *ut in parte*. Ave 171 de si e 5 di no.

Fo provà li Patroni di le galie di Alexandria, zoè sier Zuan Contarini di sier Marco Antonio e sier Vettor di Garzoni qu. sier Marin procurator. Primo 149, 35, secondo 144, 44.

Fo posto, per li Savii, la parte levar la masena, *videlicet* lire 3, e pagino *solum* lire 1 per ster de l'intrar, et lire 1 di l'ussir. Et in questa opinion era li Consieri e Cai di XL; e li Cai di X la suspese, et non volseno fusse balotada.

Fu posto, per li Consieri soli elezer il primo Pregadi uno ambasador al Papa in loco di sier Marco Minio qual richiede licentia, et uno ambasador al re di Spagna in loco di sier Francesco Corner, supplica sia electo in loco suo, con ducati 120 al mese per uno per spese, cavali 11 e do stafieri. 158, 30.

354 * Fu posto per sier Marin Zorzi el dottor, reformador del Studio di Padoa, una parte, *videlicet*, che 'l rotulo di li scolari per questa volta per le raxon *ut in parte* e per inviar el Studio sia indusiato a farsi a Pasqua proxima di Resurrectione, e in questo mezo si possi condur quelli dottori che parerà a questo Consejo a lezer etc. Contradixè sier Francesco Bragadin el consier, fo molto longo. Et poi andò in

renga sier Zorzi Pixani dottor e cavalier, uno di Reformatori electi, ma non vol meter parte, nì haver l'autorità, e parlò contra l'opinion di sier Marin Zorzi dottor e ben, dicendo si dia mantener le jurisdiction di scolari.

Et sier Stefano Contarini, sier Antonio Morexini e sier Francesco Bragadin consieri, sier Vincenzo Belegno, sier Hironimo Zane, Cai di XL, li savii dil Consejo e savii di Terraferma, absente sier Bortolamio da Mosto, messeno che se abino a balotar al presente il rotulo, et per quanto aspeta a l'ordinaria di philosophia non se abia *pro nunc* a inovar cosa alcuna, finchè al primo loco non sarà provisto de persona concedente et sufficiente. Andò le parte, una non sincera, una di no, 44 di sier Marin Zorzi dottor, 146 di Consieri e altri nominati; e fu presa.

A dì 14. La matina, in Colegio vene sier Nicolò Lipomano stato retor e provedador a Napoli di Romania, vestito di damaschin cremexin, et referi quello nel suo rezimento era sequito, e le condition di la terra, e il convicinar con turchi. Fo laudato dal Principe justa il solito. 355

Fu aldito una differentia de li Avogadori extraordinari sier Francesco Morexini, sier Mafio Lion et sier Marco Antonio Contarini, hanno cón sier Gabriel Venier avogador intrato ordinario, qual à tolto i libri di quel officio et portati in l'officio di l'Avogaria, e tolto uno rasonato a vederli Andrea dal Cortivo etc., et lo ha fato rasonato di l'Avogaria. Or parloe amplamente sier Francesco Morexini. Li rispose dito sier Gabriel Venier alterandosi di parole. Poi parloe sier Mafio Lion. *Demum* dito sier Gabriel Venier. Et poi sier Luca Trun el consier parloe dicendo l'Avogador ha torto, i libri dia star et scritture in l'officio di Extraordinari. Et l'Avogador disse che 'l non li voleva dar. Et sopra questo fo rimesso a dechiarirlo ai Consegi; sichè stetenò assa' sopra questa materia, e 'l Colegio senza alcuna conclusion. Sier Marco Antonio Contarini terzo colega non parlò.

Vene sier Michiel Malipiero, fo patron a l'Arsenal, eri ritornato di trivixana, dove è stato molti mexi, *licet* abbi compito a far legnami per l'Arsenal.

Di Liesna, fo lettere di sier Zucaria Valaresso conte e provedador, di 8 Avosto. Dil partir dil Provedador di l'armada stato li. E scrive aver avisi da Ragusi, come il Signor turco era zonto a Constantinopoli, et era stà roto dal Sophi, et che *tamen* el feva far 300 basilischi etc.

Di sier Sebastian Moro provedador di l'armada, date a dì 5 Avosto in porto di Liesna,